


雙
又
白
燕
堂
文
鐘



雙白燕
堂內鑿

背鑄四年新版

戊寅季春興
國州署開雕



序

夫豫章尋雲必植根於層巘荆寶挺璞類耀奇於鼎門
稽古瑰人杰士專精覃思莫不仰席世業互挺雅才琅
琊一編過江傳其盛藻雲間二妙入洛振其聲華蓋不
特藝林之淵海亦文囿之門基也武進陸徵君劭文淹
貫九流吐納羣雅升服賈之堂奧疏淵雲之妙詞汲冢
發冊蒼篆辨其櫛柯廣川成書博識周乎秦漢固已執
儒臬之通矩契性靈于曩賢矣又少與季父祁生大令
拔幟文壇崇闡羣藝眾流彙于爐冶萬怪集其筆端山
墅得句士林奉爲楷模竹林雅遊江左徵其軼事學刃
振而文鋒益峻珠囊啟而詞飈聿興論著鱗次富于懸

雙白燕堂文集序

一

巖之積書纓綏驢仰煥若奎垣之絢彩此豈咫聞之士
所可比跡也哉矧乎門行獨擎神崖早標至性超乎臬
魚高軌同乎郭泰過彭城之里誼洽九宗得元伯之言
不遠千里測交敦行義問久宣至若循歷川途模範岳
瀆訪穹碑于幽境搜斷碣于琳宮荆樓橫涕舒仲宣之
古懷澤潞談兵播杜牧之雄畧凡民俗之利病時事之
樛轄倫類之聚散歲月之貿遷戚愉萬途俯仰宙合靡
不萃今古于掌中發烟雲于腕下奮長髯而抵几燭幽
壑而燃犀落落奇字手拓岐陽之文茫茫壯懷袖洒廣
武之淚更攬勝槩于九區作詩史于一時者也余因大
令與君締交幸共讌遊得窺枕祕南方宦轍乍尋古歡

北里蒿歌遽傷修夜因索其遺集而敘之隻雞踐約恍
觀喬元之平生雙燕名編長感海叟之交舊云爾道光
己亥孟春長沙陶澍譔

文集 二卷

外集 八卷

詩集 八卷

集唐 二卷

金石續編二十一卷

雙白燕室文集序

二

雙白燕堂文集上卷目錄

武進陸耀遹文

段武功金石一隅序

思劬集序

唐詩正聲序

唐詩正聲序

芻蕘集序

少悟齋詩集序

延安府雲居洞八德蓮池記

樂平少山書院碑記

西安駐防城新建昭忠祠碑記

雙白燕堂文集卷上目錄

西安駐防城節孝祠碑記

費鹿溪封君八十壽序

莊邠州配蔣宜人壽序

候選縣主簿周君墓記

巴東縣募捐瘞骨啟

纂修陝西咸甯縣志凡例

巡道崔公三世墓志銘書後

雙白燕堂文集卷上

散文

武進陸燿通劭文

段武功金石一隅序

金石一隅者偃師段君嘉謨宰武功時裒集所見拓其文而著錄之將以補史牋之缺遺備方志之采輯非徒吉金貞石摩挲故物己也夫鼎銘見於小戴禮記石刻志於前漢藝文酈道元註水經多載漢魏碑碣魏收撰魏書地形志亦厯引諸碑以徵郡縣古迹金石之學其來尙矣北宋歐曾而後遂有專書趙氏之錄尤爲大備七百年來爲此學者無慮數十百家然多疏其目錄間系攷證按籍求之十軼六七傳其目而不傳其文猶不

雙白燕堂文集卷一

一

傳也洪氏隸釋隸續始甄錄全文明都氏穆陶氏宗儀仿之金石卽遷徙銷泐而文字已傳於不朽顧洪氏止載隸書若都氏僅六十八通陶氏僅七十一通殆皆隨見隨錄非有意於著述者也惟國朝青浦王侍郎昶著金石萃編一百六十卷上自三代下迄遼金摹拓全本考其高廣及行字之數悉遵點畫而備錄之凡一千五百餘通披讀其書瞭然如見古物蓋是編以金石而傳金石之文字亦以是編而傳掇拾考校旣勤且精遠出洪氏諸家上段君此錄具載全文亦萃編例也就得於武功者錄之故曰一隅余嘗求宋北平田概金石錄惜已不傳世謂乾隆中鎮洋畢尙書沉撰關中金石記

極爲博瞻關中乃海內之一隅而武功則關中之一隅也統觀所錄若隋之鞏賓唐之任令則吳達諸碑志宋之建唐太宗祠記新作武功縣廟學碑銘大觀八行詔旨石刻皆畢尙書所未見者是足補關中金石之遺爲海內著錄家所必採又焉得以一隅而少之抑此錄也以武功爲斷而錄吳達墓志者以石出於咸甯而移於武功也錄游師雄墓志者以石移於咸甯而出於武功也此段君發凡起例所未及者往者段君同縣武大令億愛古博物遂於金石之學惜段君書成不及就正於大令是錄之校證討論段君尙加慎焉

思劬集序

往年之冬楚粵搖平老友深陽宋緒菽田墨經來自連山相見於廣州時奉節孝賢母張太宜人諱方小祥泣述暫離永感之痛且以從事金革不得歸守墓田子引禮經六十不毀之義以慰之今年春菽田敬奉所錄而造請曰緒不孝無以揚顯太宜人嘗謹述太宜人懿行以乞有德之言既得兩淮都轉俞公輓詩十二章復追輯太宜人壽讌之序六十迄於九十名公達人以次引年而致祝者彙爲一編而冠以先大夫之行略以紀先德以徵遺訓諗太宜人之所以教者名曰思劬之集而寄無窮之哀慕焉感吾子之垂唁也戚容異於人故敢

雙曰燕堂文集卷上

三

以請惟吾子序而傳之耀通節母之子節母之孫奉聖善之教與菽田同而江漢星奔復同菽田之戚目瞿心瞿有不容已於言者曷敢以不文辭憶當

今上初元耀通徵詣臺省見菽田於閣督部師濟甯公坐中歐陽子所云子賢而正知母義方者也同徵士張君繼昌爲太宜人姪因習聞太宜人令善今讀是編而質之所聞益知外內交稱無溢美焉方太宜人割肱以療姑疾承夫志而致其誠不效於姑而復冀效於父飲痛蹈危一再試而弗悔雖在人子爲之猶爲絕特之行乃弱媳以之事姑嫠女以之事父非篤於至性通於神明其孰能之是尤足以起孝足以起敬足以起哀薄

之風不得以過禮過中爲議也且以太宜人之絕無所恃而矢節撫孤也竭一人之力以任一家之重竭一日之力以延一日之生銜恤盡瘁有人所不能堪者曷嘗預期大壽卜豐崇之養哉卒之保世振家上邀天寵甘苦備嘗者五十有八年年臻九十却前及見四代菽田以經濟局幹受特達之知孫及外孫後先鄉薦太宜人全福全歸無幾微拂抑之事蓋前十數年之憂勞與後數十年之康豫境不相謀而理操必致令終有俶斯其不爽者歟嘗讀前史漢晉北魏隋唐列女之傳年六十以上者纔十數人其九十以上惟晉虞潭母孫氏一人若韋逞母宋氏所稱宣文君者年八十家立講堂其及

九十以否或未之詳宋景文嘗曰女子之行於親也孝婦也節母也義而慈止矣繁祉老壽固有天焉太宜人秉景文之訓則邁宣文之大年宋氏徽音千百載而相望菽田夙夜無忝方贊嶺南莫府經武詰戎而修明禮教其將條系太宜人內行上之愜史虞潭韋逞與母俱傳而阡表祠版銘贊諱德之文行且不勝其刻敢弁簡端以爲徵引焉道光十有三年三月日序

唐詩正聲序

代

昔韓昌黎與鄂州柳中丞書稱其天資忠孝鬱於中而大作於外動皆中於機會以取勝於當世夫鄂州一書生耳用儒雅文字之業獨能不避艱險爲國立功故昌黎推服若此孰謂文學士無裨於實用歟余曩分巡陝安以川楚小醜未靖行堅壁清野之法時雨峰馬君知沔縣經畫最爲盡心費不足則捐俸以輔之垣墉固儲蓄豫眾志成城賊不敢近保全生靈無算嗣是而調最安康遷定遠廳同知所至皆治君固畿南名孝廉平日詩書是習法度是束豈嘗究心於韜鈴講求於井壘營陣之布置變化哉而其才緩急俱足恃乃知文學果有

雙白燕呈文集卷上

五

餘者機宜自無不合昌黎所言非虛也今疆場救甯十餘年矣定遠界連楚蜀於陝西爲巖疆君治之固恢然有餘憶往歲軍書旁午猶且不廢謳吟此日宣化從容知更耽於著述矣會以唐詩正聲之選問序於余自言以體正格正法正上宣君德下達民情爲主而纖巧浮靡寒儉僻澁之作不與焉此真風雅之正聲也唐詩莫盛於李杜今觀少陵慷慨悲歌諸作擬之三百篇豈非小雅繁霜以下大雅民勞以下而根柢於忠孝固變而不失其正也猶之兵法先爲不可勝以待敵之可勝往往出奇制敵以示不測而終不詭於正也茲編每選一家前有傳後有跋論世知人詩之中可以通史且當日

政治之得失人心之邪正風俗之清澆宛然在目詩之中又可以求治以此選詩自不拘於聲律章句以此讀詩庶幾議事以制政乃不迷益信君之得於學者深而及於物者宏矣爰不辭而爲之序

雙白燕堂文集卷上

唐詩正聲序

代雲耕觀察蘇榜額

選詩難矣而選唐人之詩則尤難初盛中晚風氣既殊體裁亦異流傳至今者四萬八千餘首作者二千二百餘家欲使分鑣散軌範我馳驅此選詩難於作詩而體大物博則又難之難者也某童蒙就塾請業於雨峯先生竊見先生與都下名公相唱和研思赴節妙合三唐蓋其深造自得凡一代之源流宗派正變清濁莫不高下在心嘗謂詩盛於唐而選無善本英靈間氣局於時代篋中才調域於方隅文粹百卷但仿昭明安石百家轉遺李杜或僅登三體或專采七言或刪清廟明堂之製而錄山林楛槁之詞或舍昌明博大之篇而搜閭閻

雙白鹿堂文集卷上

七

香奩之什協諸風雅未得衡平於時詞壇尊宿引爲知言請操選政先生亦欲討論成書嘉惠後學自隔季長講幄三十餘年先生敷歷關中方以通經致用未知此事此志竟何如也前年春某任陝西督糧道其冬先生自定遠至西安得一拜見年已七十有五鬚髮頽白而矍鑠如壯時因悉歷官以來治行勞蹟臺評輿論上下翕然四充鄉試同考得士最盛所至以敬教勸學爲先務諸生以詩文就正評隲未嘗少倦雖在軍旅不廢詠歌以此見先生文力彊健愛素好古數十年如一日也今年夏以所刊唐詩正聲見示曰此吾平生心得欲以公之同好者其爲我叙之受而卒讀計所選四十七卷

凡二百二十七人詩萬三千一百餘首人有小傳詩有
跋語以初盛爲宗以中晚爲輔其閒陳時事詠景物寫
懷抱沈實高華詞無定格要皆不詭於正而纖巧綺靡
僻澁之作概無取焉其李杜韓白四家別爲一集亦猶
嶽瀆之大不宜與一邱一壑等量比觀也夫選者之性
情旣正必求作者性情之正而選之而讀者之性情亦
因之以正是以古人之性情範今人之性情使之各得
其正者皆先生之力也執是法以上求之漢魏下求之
宋金元明以及

國朝詩人之旨未有失乎正而可以云詩者由先生之
說而隅反之禰乎詩教豈淺鮮哉豈淺鮮哉

芻蕘集序代

前明衡府紀善泰和周先生芻蕘集詩賦雜文凡六卷
卷帙如四庫書目而冠以衣帶銘及保國直言二篇別
爲一卷曰芻蕘者殆指直言上下篇而名之遂以名其
集也越先生致命之秋四百三十七年裔孫翰林編修
作楫視學廣東西校刻於桂林試院剗刷旣成郵書東
省問序於鴻賓鴻賓自惟謏劣不足仰窺先生所學而
敢序先生之集乎顧於先生爲同省後進且與編修同
官景嚮高風樂見其表章先德又烏可以不文辭也當
建文草除之際朝臣多捐軀殉國從容就義慷慨成仁
至今想見其人廩廩然猶有生氣嘗考南都表忠之祀

雙白燕堂文集卷上

九

而知豫章之節義彌多及謁南昌大節之祠而歎吉安
之忠良尤盛蓋江右十五賢中吉安實居其八一時義
薄雲霄忠貫日月若皆萃於翼軫之間其以氣節文章
並垂不朽者則又以先生爲最我

聖朝勅脩愷史詔採遺書於靖難死事諸賢尤深致意
先生自謂言無不直行無不果而於經史百家靡不通
究故其爲文雅贍條達風骨稜稜望而知爲忠臣義士
列聖論定歷久益彰而集皆先生手訂足以傳信方來
又非如新塗練中丞集間有後人依託亂眞爲可疑者
以與方甯海遜志齋集程績溪貞白遺藁鼎峙於千秋
洵無忝矣先生平生著述二十餘種明之中葉已或傳

或不傳惟是編一刊於萬曆十六年再刊於康熙三十
七年子子孫孫世守弗墜用得登諸天府而副藏於家
編修復以使節優賢授梓廣播將使挾兩間之正氣傳
人傳文相傳以行乎天壤植綱常而垂名教聞風立志
豈直一邦一邑足徵文獻而已哉德化後學李鴻賓謹
序

少悟齋詩集序代

少悟齋者南昌方學士容齋先生振讀書之所因以名其集者也容齋捐館舍九年其賢子比部君用儀哀集遺詩不遠千里自里門踰嶺而南乞予弁言卷首予與容齋同舉於鄉越十年同以進士入翰林處則同方出則同官交久而深無有如予與容齋者今序容齋之詩既爲容齋惜且爲容齋慰幸也當容齋以文學侍從受睿廟特達之知迭掌文衡分持使節每當相別相見握手道故愴勸風義砥礪經術以上下其議論其所自期待與所相勗勉曷嘗沾沾於語言文字間哉容齋不自命爲詩人亦未肯出其緒餘以與當代詩人相標榜而

爭壇坫則茲之所衷集者殆容齋所棄如敝屣而不自收拾者歟聖門之序詩曰詩者志也在心爲志發言爲詩人之於詩也有得乎詩之中者有超乎詩之外者得乎其中者沿流溯源俾聲揣律顓門之業也超乎其外者平生樹立別有表見而風雅流露不求工而自工所謂餘事作詩人者也吾卽詩以求容齋深惜容齋以高才名德遭際之隆卒未竟其用而所傳止此顧念容齋雍容敷歷垂二十年其立朝風采卽不必以詩鳴宜有可以不朽矧其詩復與顓門者同工又足分當代之壇坫哉用儀表彰先德惟恐不至凡所以報國承家昌大先人之志者固將於是詩之刻推之吾故以惜容齋者

爲容齋慰幸焉德化李鴻賓序

雙白燕堂文集卷上

士



雙白燕堂文集卷上

延安府雲居洞八德蓮池記

代

海內古刹以雲居名者余所至有三其在房山有隋沙門靜琬藏四大部石經在杭州爲中峰禪師靈蹟之所而延安之雲居寺則自明季堅行僧性濟修治遺址歷百八十年得慈海開土而興復之皆非偶然也寺在延安府治北二十餘里傍山結宇山有雲居洞因以名寺焉去洞數武高嶺環合有崖突出類懸壺泉流涓涓承溜爲池池曰洗心未詳其命名之義或以臨濯筋川上寔宇記載尸毘王割身救鵠洗心之名因濯筋而傅會歟慈海隱於終南寺旣荒蕪池亦就涸嘉慶辛未復卓錫斯池乃鑿石疏泉以恢其舊淤者窪之塞者通之荷

雙白燕堂文集卷上

三

鍾導杖水泉迸出非僅如向之涓涓者矣慈海又於池旁闢渠引泉蜿蜒入寺寺僧行汲不勞而居民之飲漑於池者日以千計夫引方便之途通利濟之源此非諸佛之願力而諸法之功德乎予以辛丑之春出守延安飲池水而甘之取內典八功德水題其池曰八德蓮池攜郡之文士往遊其間於慈海有方外之契嘗思仿柳柳州記其近治山水以諭於後人卒卒未暇道光壬午奉命分巡浙西回憶雲泉有三宿桑下之感慈海亦慨盛會之不常而懼勝地之不著繭足四千餘里謁予而請曰自公去延思公教澤者咸沐浴而詠歌之惟八德之池亦公教澤之所寄也而未有以記抑慈海聞

之師曰此山爲碧簪之山或云筆簪形家者以爲延郡
人士之望自昔大司馬太保趙公濬泉池以與文運流
澤寢衰幸公嘉惠延士拔其翹秀於黌舍書院之中最
以道義而誨之詞章數年之閒掇科相繼如水之始流
泉之始達微公教思之澤不及此卽以此池紀公之德
以兆延郡文運之興凡涵泳於公之澤者皆樂聞而快
覩焉不獨慈海一人之夙願也予旣深愧其言且謝不
敏顧惟慈海修葺疏濬之勤復恐久而湮沒遠求予文
以傳之予甚憫其力之憊志之堅而功德之不可泯也
爰書以貽之俾碣諸洞斯寺常新斯泉不竭慈海之有
造於雲居者庶幾與中峰靜琬鼎峙於南北哉元和陳

鍾麟記

雙白燕堂文集卷上

十四

樂平少山書院碑記

代

書院之法昉於宋安定胡氏之湖學濂洛關閩繼之元中統初置諸路學校官復令縣設小學選老成人教之其先儒名賢舊址與好事之家出錢粟贍學者並立爲書院書院之名自此始元之季年曲阜孔克威徙居樂平建書院於蘿莊名曰松峰呂左丞爲之記樂平之有書院蓋自孔氏始也前明以來廢墜無考

國朝乾隆中知縣定興鹿君師祖就文昌祠爲書院知州長清曾君尙增記之繼宰是邑者爲蕪湖陶君鏞修葺振興題曰沾城書院宜興儲宗丞麟趾序其課藝樂平之士彬彬以文行相尙矣垂數十年遂以頽廢其肄

雙白燕堂文集卷上

五

業於州之冠山書院者重舍乃達負笈之士亦寥寥焉嘉慶二年省縣九州沾城講舍幾於湮沒於時里人宋通判瑀慨然創修而未就其子封知府從龍繼其志捐錢五千緡孫生員中和協捐三千緡以二十三年請於前知州吳君仍就文昌祠立書院顏之曰少山議散緡錢於典商歲取滋息以資經費州上其事臺憲嘉之樂平書院之成有日矣會商人疑阻涉訟持之數年道光初元予守是州大府檄治其曠宋君懼道謀之無成垂成之或敗請以所捐錢緡自權子母歲得息錢七百六十八緡定以規條凡歲修月餼及輿衛僕賃之資量所入而取給焉經帷講席室堂次舍庖湏之屬莫不整具

予既樂觀其成親蒞樂平扁多士而試之拔其秀者若
而人延州之舉人葛君夢庚以文學德行身教而口授
指導之從學之士誠能親師取友敬業樂羣安見稽古
之樂不與楊喬前賢輝映耶大易訟之象曰君子以作
事謀始漸之象曰君子以居賢德善俗知訟不可長而
漸進以正識者卜宋氏必將有後也天下建置之故廢
易而創難圖其始固難善其後尤不易樂平由郡而州
而縣而鄉地處偏隅書院之廢興無過而問者宋氏三
世勸善積慮期成猶復遲久而集事經始之難若是慎
終如始非所望於善後者乎抑予有進焉爲善於其鄉
者薦紳之事也勸善而輔翼之者司牧之責也宋氏不

惜厚貲又爲加息其所以敬教勸學趨義急公所謂爲
其難矣他日者人文蔚起會計殷繁用或有不敷力或
有不逮以所捐錢緡歸之於州宜如其請而經畫之積
諸不涸藏諸不竭用佐我
國家養士作人之效尙亦有基勿壞毋若松峰沾城之
旋踵廢墜非樂平人士之至幸乎故并記之以諭來者
道光二年十月平定直隸州知州江甯沈琮撰

西安駐防城新建昭忠祠碑記

代西安將軍成德

成周之制事功戰功銘書太常祭於太烝其勇而死義者配食於明堂所謂大享先王從而與享之非專祀也漢晉以來式閭表墓史不絕書然未爲著合典唐天寶中始詔郡縣長官忠臣義士所在置祠宇春秋致祭後世仿而行之則又闢幽於異代非卽揚烈於當時者矣我

大清之勅建昭忠祠於京師也始於雍正二年王公大臣以死勤事者位於正室而陣亡官兵從祀兩廡其宜祀者禮部題請得

旨工部製牌位欽天監擇吉太常寺奉以入祠兵部具

雙白燕堂文集卷二

七

職名籍貫事蹟移翰林院立傳每歲春秋仲月吉日承祭大臣以少牢祭於正室太常屬官十有三員分獻所祀王公諸臣之子孫在京師者咸與行禮典至隆焉嘉慶七年冬川楚教匪蕩平

詔各直省府城建昭忠祠凡陣亡之文武官及兵丁鄉勇按本籍入祠春秋致祭禮視賢良祠其駐防滿兵從征陣亡者於駐防省之昭忠祠從祀位於綠營兵丁之上西安滿洲營自順治二年移駐以來凡歿於西藏大小金川蘭州石峰堡及川楚軍營者悉以嘉慶八年合祭於祠祠在西安府城西郭外人跡罕到祭之日世職而外兵弁無與祭者幾不知享祭爲何人并不知致祭

爲何禮迄今十有四年敬衰於歷久某過其地常悚息焉爰率羣僚集貲卜地卽於駐防城建祠以祀駐防官兵之死事者官若干員兵若干名祠正室若干楹左右庶若干楹前後室若干楹門若干楹修具粟主誡曰入祠榜示祭品儀節酌定章程入旗官員以時致祭皇仁之徧臣節之彰執事兢兢咸知起敬矣祭法曰以死勤事則祀之說者謂忠於國者弗顧其生義於君者弗恤其死報以俎豆亦克用勸顧爵位之所不及卽捐軀疆場亦泯泯已耳何幸

聖天子顯忠勵節明禋脜蠻徧逮乎官府鄉州不遺乎伍兩卒旅所以維萬古之綱常而均九京之銜結者不且幽明胥洽也哉

西安駐防城節孝祠碑記

代成侯

朝廷崇尚節烈坊表遍海內府廳州縣衛咸有祠宇所以馮翼陰教顯微而闡幽者至隆且備也滿洲官兵移家駐防西安

國初至今百七十年凡節婦貞女例得旌表者歲具事實册報禮部核議彙題建坊如制而祀於京師節義祠在外子姓鮮能與者成德謂妥侑馨香不囿於地矧挺標振秀式於茲土者乎桐城方侍郎苞曰滿洲禮俗婦人勤女職事舅姑於古禮爲近夫其矢志撫孤或從夫以死滄德異烈遭變而益彰者自故家卿族以及委巷單門苦節之貞所在而有觀西安滿城綽楔所列而知

雙白燕堂文集卷上

七

國家風教之盛無弗屆焉爰集僚友之同志者謀建節孝祠於城中次其位序若而人享於春秋祠成謹爲之記

代莊虛菴先生祝費鹿溪封君八十壽文

嘗讀詩之幽風曰爲此春酒以介眉壽豈不以春之爲氣清而溫養生之首故酌大斗以祈黃耆者有取焉今歲耀州刺史歐餘費君其尊甫鹿溪封公年臻八秩懸弧之辰在六月而置酒之期以三月意亦猶行古之道歟刺史以予締交封公且四十年乃乞言以侑觴其曷可以讓在昔漢之于公爲郡決曹嘗高大閭門令容駟馬高蓋車曰我治獄多陰德子孫必有興者至子定國爲丞相孫永爲御史大夫封侯傳世後漢郭躬之父爲掾用法平郡內比之于公年至九十五躬爲廷尉其子暉亦至南陽太守夫法家者流出於理官秦漢之際猶

爲未失其職吏之傳習者多宜其以文毋害也且掾史仕宦每至卿相猶或有所激勸而然魏晉以後乃衰息矣然則世之出於刀筆筐篋而以廉平著稱者不尤難能而可貴歟則封公其人矣封公家世宦族由茗溪而遷吾邑自少孤貧乃爲郡掾以自食力其所平決皆厭眾心卽或麗於文網而有可代爲申恤者靡不盡力徐州有妖言之獄臺符太守卽訊以封公從既閱實罹法者眾乃請於太守曰在古有蠢愚之宥今以一細民惑眾而使蚩蚩者株累至數百人以上懼傷天和盍宥之乎太守初難之封公諍執再四伏法者僅數人餘皆以免及長白增公爲郡守尤相引重其後价藩隴右延以

入幕所草章奏每多報可爲設規條皆可施行蓋封公
遇事必酌情理之平而議法甯依於輕不爲重比其大
較也倦遊而歸不復給事公府樂善不倦乃自性生邑
中有好施與者封公爲之倡率於是月必有會曰棉衣
則沍寒之時貧乏者獲免僵凍也曰敬節則恤緯之發
不嫁者有恃以守也曰扶厝則比於古者孟春之令家
無所有者皆得拵靈也族黨多待以舉火又察里中極
貧之家常以緡錢助之每冬月將盡償樹檀之直猶數
十百千如是者有年家計以窘其歲乙巳大飢日僅一
食而行之益力以是邑人無識與不識稱善人者必以
封公爲舉首焉家居課兩嗣君讀書甚有法刺史君弱

冠中順天丙午科副榜隨牒陝右由州判擢宰長安作
牧耀州開敏練達特爲憲司所倚任軍事之殷也幕府
列上勞勤當擢用郡丞及州之有屬邑者得

旨俞允次君初丞益都南河帥稔其才檄赴袁浦綜理
得宜遂邀甄叙今任儀考廳通判封公以長君貴

誥封奉直大夫復以援例晉中憲大夫兩嗣君數具舟
車以迎而封公燕處家術孫曾滿前以頤養閒曠爲樂
未嘗命駕其於榮顯泊如也夫儒者持論常本於易之
積善餘慶乃或河漢其言則曷不徵之於古如班固以
定國之祚由於其父范蔚宗亦謂法家之能慶延於世
旣以然矣乃由古以驗今當吾世而得封公其福祿壽

考施於孫子復如是然則爲善無不報殆事有必至理
有固然者歟予初識封公在壬辰之歲年運而往久宦
秦中乃今得乞休歸里及封公介壽之時舉一卮以相
屬抑又聞封公往時恃杖而行今茲家有小樓每日緣
初椽十餘上下無倦容杖則卻矣或疑其悅生佚老當
必有術而予則以遠祖南華經有言爲善無近名可以
養身可以全生此與班范二史之詞若出一喙固知封
公所以爲養生之主者在此而不在彼也是爲序

莊邠州配蔣宜人七十壽序

代

著雍敦牂之歲余隨牒入關獲交邠州刺史莊虛菴先生如舊相識余家海昌距毘陵五百里而近知其邑人門之盛無踰莊氏既仍世契好又重之婚姻耳熟先生之才且賢然未嘗有一日之雅亦既觀止而知前所聞爲不虛也又明年而嗣君大令遠吉由特簡來陝右需次數數相見頃者告余曰遠吉之母年七十矣茲當設輓之辰願乞一言以光屏幃余不可以辭嘗讀小雅四牡之詩其三章曰不遑將父其四章曰不遑將母蓋其入父母俱存而能以才謂自見若所謂膂力方剛經營四方者不以私害公不以家事辭王事文王探其內顧

雙巨燕堂文集卷上

三

思歸之情而勞之以詩顧於理章申之曰是用作歌將母來諗惟欲以將母之情告于君者何歟說詩者以爲母以恩意偏多故再言之夫父母義一何以謂母之恩意偏多乎竊意其時父或有四方之志不得晏處於家雖欲温清定省而有所不能則將父之思猶若可緩若夫倚閭倚門之望母則靡日無之上堂問起居入室問甘旨則又歸而卽得者以是致養之情尤迫也大令之初至陝右也大府以榆林民俗傲劫思得良吏以拊循之俾先生佩郡符以往大令會一省視而奉母蔣宜人於西安以敦潔自之養軍興以來需才孔亟大令開敏練達爲上游所知由是而攝蓋厓咸陽調咸甯皆著聲

迹盤錯以別利器有虞升卿之志焉供帳四法而辦有
王子贛之略焉謂宜馳驅鞅掌北山之詩且由之而作
矣今乃以陶陶孟夏列長筵而舉壽觴夫馨爾夕膳潔
爾晨饑此補南陔者之所有事也而得之於日昃不暇
之時或宴於林或禊于汜此賦間居者所爲色養也而
得之於戴星出入之際維昔之駕四牡者固嘗流連嘔
嘆而不可必得而大令適所願焉可不謂之美談盛事
也乎宜人人家世儒雅祖教授公經明行修海內宗仰世
所稱東委先生者是也是詩禮之教浹於平日洎歸
先生君姑錢太宜人爲尙書文敏公之伯姊治家嚴肅
宜人逮事者二十五年未嘗一日有惰容倦色太宜人

雙白燕堂文集卷上

五

邁疾衣不解帶者十旬戚御稱之先生嘗應學使者之
聘校藝皖江苞苴不入所親或以五百金爲餽先生峻
却之宜人蓋有助焉夫雞鳴之詩有警戒相成之道宜
人方食貧而所勵者在廉隅先生服官三十年潔清自
矢郭無二頃之田殆由於此矣若夫事姑以孝則牖下
之事亦必齋肅以將之風有采蘋采蘋明宜家而教成
於國也宜人旣以懿德美行佐先生爲令妻而卽以訓
大令爲賢母自今以徃緇衣之咏將不能專美於前而
俾昌俾熾所以保艾爾後者且靡有已也敬揚扈而陳
之不獨爲大令博慈顏之一笑試遠寄榆中先生亦當
爲之引滿也已

清故登仕郎候選縣主簿周君墓記代

君諱爲漢字嶠東一字筠雲姓周氏浙江浦江人曾祖諱紹餘祖諱啟亨隱德未曜考諱能珂甘肅山丹縣知縣妣丁太安人山丹府君生二子長心如君其次也性孝友少有異稟於書無所不讀喜爲駢儷之文而尤長於詩所至交其賢備達官長者亦聞其才而引譽之顧以耿介傲睨罕諧於俗屢試不中式以親老援例爲縣主簿非其所好故終身未嘗謁選山丹府君卒於官心如遠宦廣西君銜恤交代官私皆理奉喪至西安太安人復棄養哀毀過甚遂得痼疾旣以貧不能歸乃窆先人於長安服闋心如仍補官廣西迎君之官所君固多

雙白燕堂文集卷下

三五

病遠思骨肉力疾就道卒於武昌時嘉慶十七年十一月丙申也生於乾隆三十九年四月丁未年三十有九娶馬氏先君一年卒無子以心如之子仲芳爲嗣嘉慶二十年五月庚寅歸葬於長安塔坡里先塋之側配馬孺人祔焉君爲詩幼尙宏麗長乃縱鑿險峻鉤章棘句骯髒而激昂自流寓長安六七年來沈頓牢愁歸乎要眇其言有見道者哀集所遺可得二十卷文詞雜著凡若干卷惟枕善齋詩初稿八卷已刊行君好藏書籍及金石之文雖流離轉徙常以自隨今并其遺集歸於心如嗚呼以君篤行嗜學負才而無可用又不假之年使得竟其所就豈非命哉要其性情所寄有不容泯者叙

次梗槩刻石而掩諸幽且求世之能文章者表其墓焉
兄心如記

雙白燕堂文集卷上

三

巴東縣募捐瘞骨啟

代

巴東當楚蜀之交江水歷峽東逕其地凡八沱九灘沿
泝阻絕行舟失戒死者相藉於盤渦沙磧之中不可計
數乾隆某年予承乏是邑周覽山川險要目擊漂流沉
溺之慘思所以爲瘞埋計者時湖州賈人某釀貲收斂
獲尸置諸石棺久則歸骨於義冢予嘉其好善之誠且
慮費之不可以久欲募勸捐輸馳公以成義舉數年中
軍務絡繹後以考滿擢任荆門未竟所志顧每念浮骸
暴骨委岸填波野豕磨牙江豚鼓腹未嘗不怛怛於心
而不能去也周官之制曰有死於道路者蜡氏埋而置
榻焉書其日月懸其衣服任器於有地之官以待其人

雙皇堂文集卷上

毛

然則掩骼埋胔之政非有地之官所宜盡心者乎第古
之有地之官皆舉於其鄉情親而地習又有蜡氏以士
四人徒四十人掌國之泮禁故其政易行今州縣所治
數百里而遠其風濤不測之地傷人滋多又非道殣旅
亡可比察之勢有不周卹之力有不繼是惟賴其鄉之
賢士大夫與贍於財力之善人長者設誠經畫爭先樂
施仰體

聖天子澤及枯骨之仁以佐長吏奉行之所不逮亦民
俗敦龐之一助也夫鳥獸見其類之斃於野者猶悲鳴
頓躍若不忍視行蟻遇殭蟻必銜而瘞之於埕蓋同類
相愛物之稍有知者莫不皆然况身爲萬物之靈而視

其類之摧殘暴露有不惻然動容潛然出涕者乎仁人之量極之博施濟眾而其端發於乍見惻隱之心故一介之士存心利物於事必有所濟予旣嘉某賈之誠而未能有以善其後用是深望乎此邦之賢士大夫善人長者相與踵其事而遵循之以爲可久也其所捐之數自若干以至若干有差惟各盡其力之所能及俾積於公以爲常法諺曰一人善射百夫決拾巴邑其庶幾焉

纂修咸甯縣志凡例

圖表志傳四者不具不可以爲志近代方志多詳志傳而畧圖表方位道里非圖則廣輪不明沿革紀事職官選舉非表則經緯不具蓋有文字者曰志曰傳無文字者曰圖曰表而圖則有準望分率之法表則有旁行邪上之例無文字未始不條理秩然故梅文穆公曰史雖無圖然表亦圖之類使并圖表去之則胥吏之擋册非古人以地理入史部之意矣今志首圖次表次志次傳悉如史例

宋人方志無不著所採書名者近代引書多不註所本遂使真贋相參後人無所考證今志凡徵引羣書必註

雙白齋文集卷上

三五

明書目卽縣册採訪册亦必註明庶免無本之誚圖以開方經緯爲主摹擬景物非作圖之要也今自城社山谷水道歷代疆域古渠舊城悉具於圖圖系以考與志相表裏

喬三石耀州志稱星野爲秦蜀所共一州二縣小不書其論甚允一州二縣尙不足書况一縣乎惟地平經緯恒以二百里差一度咸甯境之錯入他縣中者至三百餘里之遠晨昏晝夜皆有積差謹遵

欽定西域圖志載晷度例作縣境經緯圖而星野從刪咸甯與長安分治郭下今城圖內兼及長安諸坊藉見會城全制其分圖則惟載咸甯以存界域

八旗駐防城雖由縣境分出然直隸京師非志所得載今惟全城圖內略具大凡他如衙署志止載將軍副都統署祀祠志惟載昭忠節孝祠其餘典章制度名臣碩彥俱不敢載入以符體制

山原脈絡水道原委地理志綜其大綱仍於各社圖後分註始末務使綱目分明

南山谿谷錯襟道里紆迴今依山脈自西而東繪爲長圖其磨溝錯入鎮安龍王廟錯入藍田者別附於後歷代沿革非圖無以明疆域非考又無以明圖今皆詳爲考證標以今名

方志考古多言在縣某方或言某方幾里方隅遼濶求

古蹟者何所指證今志於考據古蹟必實指某地某邨疑者缺之不敢臆斷

隋唐京城制度宋敏求長安志至爲詳悉近惟畢氏經訓堂有刊本然宮殿方位間有舛訛諸坊亦多錯漏別無善本可校今以六典唐書及百家傳說互爲考證具之於圖仍錄原文於考中

元李好文長安圖中口內等圖並與宋志互異以相傳既久附存之宋志禁苑甚略則直以李氏圖爲本通志及縣舊志所圖隋唐都城舛誤百出不可枚舉今悉以宋志爲準

唐城今城各繪一圖以朱墨別之一覽了然俾知世稱

古蹟或係訛傳

如祭臺爲唐郊壇

或出後人移建如開元花塔諸寺考

古者庶不惑於流俗

宋金元城與今城大同小異分爲圖考明城則除駐防

城外悉與今同不更圖

城南古蹟最多宋張茂中之記最爲可據今繪爲圖而

全錄記文于考趙嘏記與張記相表裏亦錄之而凡諸

名勝之無類可歸者亦附篇末

隋以前皆都長安故城凡京師之事與縣無涉今斷自

隋以下

紀事惟取事之隸於地者他皆不書又有事雖隸於地

而實不在境上者如秦悼太子葬芷陽在藍田宣太后

葬茝陽在臨潼之類皆不書

雙白燕堂文集卷二

三

北周以前之萬年在今臨潼渭北唐之咸甯郡在今宜

川皆與縣無涉舊志名宦載晉萬年令王育咸甯郡太

守趙奉璋田賦載唐咸甯郡戶口數人物載三國萬年

人楊沛皆爲訂正

咸甯志初始於陳北海其書不傳今所稱舊志爲康熙

七年知縣黃家鼎所修其稱長安志則宋敏求所撰至

新修長安志則稱長安縣志以別之

舊志修於國初時方草創書籍未備凡所援引舛漏

頗多今悉爲補正卽職官表唐宋合丞等補至八九十

人其餘典章人物務詳於徵引而嚴於考覈舊志凡引

故書不註所出悉檢舊文爲之補註有未詳所出者亦註明舊志不敢鑿空

紀年不宜純用甲子科目必書某年史例也今選舉表遇鄉會試皆書某年某科

鄉飲賓介猶古人鄉舉里選之遺意附見選舉表

地理志叙山川皆以脈絡源流爲次圖詳其巨志則統其綱也

舊志景致非典章所係後人以意增加或八景或十景且杏園賜宴等亦非今時景物從刪

至治之世國無殊俗卽民間歲時風景全郡略同無庸專志今仿班史之例約舉四鄉風俗具於地理志

雙白燕堂文集卷上

三

咸甯無異產秔稻黍稷土地所宜舉其大凡舊志臚列所有至螢蚊蠍蟻不可勝書今刪

戶口舊附田賦自康熙

恩詔後續生人丁作爲盛世滋生册永不加賦而戶口與田賦分而爲二保甲之法以地統人至爲覈實今以嘉慶某年保甲册爲準如歷代史志例附入地理志而田賦志內則惟載舊時丁額

附郭之縣壇廟衙署散在兩邑今惟志在境內者

寺觀等雖非典章然相沿已久今仍陝西通志例附祠

祀末

諸祠宇必書祀某人惟孝弟昭忠節孝等俱見傳中不

複載

歷代祠廟官署已見圖攷者志中不重見

通省志序例稱事關直省通行載在會典等書者如樂章樂器等類非秦志所宜書通省志且不載何論一縣咸甯文廟統於府學尤不宜載及直省通行之典禮舊志樂器等既多漏略而樂考等篇爲隋唐一代通制載於縣志尤爲非體今刪

陵墓前人附會者多今悉爲辨正仍存原文以示闕疑之義

舊志藝文序稱無裨世道雖美勿彰斯言最爲得體然揆其所收自相矛盾如牛頭寺二十詠豈關世道耶且

雙白燕堂文集卷上

三

倣此而收不可勝紀收封張安世詔則唐代諸制詞皆當全錄矣收唐太宗建三師詔則歷代建學諸詔皆當全錄矣收張敞之書朱博之奏蘇武之詩杜甫之西嶽賦杜牧之阿房宮賦及後人之四川鄉試錄序等篇則從唐以來縣人文集皆當全錄矣收貞觀先農樂章先蠶樂章則隋唐郊廟樂歌皆當全錄矣載唐中宗內殿宴詩韋述集賢宴詩則唐人公宴諸作皆當全錄矣本傳之外更載銘誌則唐宋文集所載咸甯人碑碣皆得備書陵墓之下復載墓銘則碑林諸石及他志碣全文亦應悉載如此則增至數十百卷尙在挂漏今依宋羅願新安志例附藝文於各條不另立名目惟有關典章

制度及風俗人心者得載

經籍之志始於隋書與漢書藝文志名異實同皆志著書篇目今從隋志仍以四部爲綱

碑林石刻甲於海內首冠本朝御書尊尊之義餘皆以時代爲次碑林而外幢碣甚多有著錄家所未見者有已錄而今佚者有原出縣中而後移他所者有出自他所而爲縣人收藏者分別錄之

傳首良吏爲官斯土者勸也先賢先達以列傳統之其忠節孝友義行儒學文藝逸民方技仍如史例分傳流寓不可勝書非徙居如田何舊望如杜甫者雖第宅見於坊圖邱壟紀於墓志概不牽合

雙日燕堂文集卷上

三

邑人未論定者不入傳惟節婦例得旌表者或專傳或合傳以時代爲次

志自康熙七年纂修迄今一百四十餘載徵文考獻墜緒難求茲以嘉慶二十二年七月開局紳士採訪必公必勤惟慎惟速爰偕及門董祐誠方立并日編輯於次年四月草創粗具討論修飾俟諸大雅焉並記

巡道崔公三世墓志銘書後

崔氏有清河東武城博陵安平諸望唐書宰相世系而外志載顯慶登科記其列於姓氏英賢傳者秘笈新書元和姓纂多引之漢晉以來久爲海內著族

國朝伐閩首數蒲州自蒲遷吾常者始於峒右先生嘗觀察蘇松調常鎮朱邑桐鄉之義也一傳而曼亭先生再傳而雲客先生並以進士通籍並官監司雖籍仍蒲之永濟而表阡於常之武進已三世今距乾隆丙子凡七十有六年定爲吾常土著編諸戶版於例爲宜合觀三世志墓之文清秩廕仕皆三四十年更由峒右先生上溯之惟祖惟父卽已厯官江表下則雲客先生仲弟

雙白燕堂文集卷上

三

金堂君亦任方州劇縣仕宦不爲不盛僑寓不爲不久而至今僦屋以居祭田之餘未有恒產墓志稱故里無一椽無一壠良誌實也豈廉吏可爲而不可爲耶予不及見峒右先生顧嘗客授於曼亭先生荆南賓館雲客先生自泗城展覲請假定省得與論交而羣從多從予請業今曾震以縣合待次曾益通判浙江歷佐湖處二郡曾泰宰廣東之龍門調署順德浙粵兩省皆有先人遺愛乃知甘棠之澤夔訓之清芬也貴而能貧可大可久吾於崔之濟美徵之曾泰以吳恭人憂去官旣服闋將謁選人捧持此冊請予書後爰舉奕世清德所以佑啟後人者勗其聰聽焉報國承家引之勿替匪直名宗

之慶抑亦吾門之望與吾鄉里之榮也道光十一年夏
六月記於嶺南行館

雙白燕堂文集卷上

三

雙白燕堂文集下卷目錄

武進陸耀適劭文

齊北瀛太守鯤紀 恩四圖總序

管蘊山侍御詩文集序

國朝奏疏序

石倉山館印譜序

朱子像贊並序

眠琴小榭跋

唐氏兩世節孝贊並序

方友槎刺史雲洲草堂壽讌詩序

章佳督部繹堂先生五十壽頌並序

雙白燕堂文集卷下目錄

澹和草堂壽讌頌並序

演連珠八首並序

演連珠十二首並序

祭故臨潼縣知縣莊君文

祭劉芙初編修文

祭莊伯鴻司馬文

陝西同鄉公祭費鹿溪封君文

祭黃恕堂先生文

陝甘總督那公夫人誄

莊節母于太恭人墓誌

陝甘總督章佳公夫人靈表

雙白燕堂文集卷下

駢文

武進陸耀遹劭文

齊北瀛太守鯤紀 恩四圖總序

夫華平之木應晞陽而猗芬歸昌之禽望縵采而翮羽
况復六麇服路之代五鳳調元之年天鏡澄文地繫翕
載通正和其嘉會介類推其允錫優賢之風歷試闔門
之瑞允升是以周宗熙業山甫著將明之才魯篇熾宜
庶士多燕喜之譽嘉慶辛酉北瀛先生以進士入翰林
於時黃離繼明滄島重潤陽兆之禮既洽寶籥之書待
纂先生珥彤史成袖置仙室千七百水通波沈綠之池
二十八宿窺影琉璃之篋中經校簿紺煙襲衣石渠坐
論華月升席蓮檠徹照卽對熙連之城金櫝旁開更入

雙白燕堂文集卷下

一

閨風之苑

國家東撫開梧西綏燾靡南諧孫樸北燮禹暉雷鑿雲
空絃周縝布昭蘇蟻蛭之穴頡眴鱗介之渚顧彼中山
邈當前戊斯地也魚門匹溢鯨路機槍鼉龜浮嶼則陽
轡逸翔落滌奔閭則賁芒沸霞三重壘柵近絡摺天七
九仰規斜縣赤道先生英蕩光塗皇華被隰祖楫擊汰
遠架鼉鼉之梁澹劍橫腰自得蛟龍之氣鳥冠螺飾肅
拜天人樹衣熊甲悃瞻漢節懽斯舊姓棄木獸而申驅
波羅邃居闢雕禽而拚待蒙蒙焉喁喁焉懌喻乎德意
聳慄於威稜者矣若乃長卿使蜀嚴助歸吳發功竿之

符馳甌越之傳而成都父老僅有王孫會稽故社惟傳
友壻先生則具慶習祥重蔭專楸華黍侑潔恒餽佐馨
麟章絢其舞衣霄露斟其康爵星旄燭夜大明孫子之
垣海殞移風化成孝養之國畫繡之樂今古蔑焉迨乎
尹表三河割守百邑飭東都之禮復司隸之章社鸞儀
樹時見交枝歸雁銜蘆多迎露軾爾乃雞渾上揆烏帑
鶉火之維鼇紀下清碧洛黃嵩之館鳳飛地闕龍度天
門銀援界壁俛鏡河仙石象高龕下臨震旦元夷秉鑿
發玉簡於妣封榮光負甲肅靈壇於姬璧臯稽擁旗屏
翳承蓋湛甘醴於葦杖滲酸雨於輕輪是又陝左之芟
留其蔽芾鮑氏之驄數其工步者也榮問懋昭祥祉蔚
備爰志圖畫都爲四卷曰玉局校書曰球陽持節曰蘭
陔洗腆曰龍門秋禱盤礴之事旣彰風詠之才滋盛異
日南宮肆開麟閣躋列趙州萬戶繡平原之絲荒憬九
譯謁承宮之貌呂溫授簡待著凌煙之銘王褒宣德先
譜中和之頌

夫至可感者契闊之情最難忍存歿之境啼猿一聲萬籟俱寂愁雲四合眾山欲摧過黃公之酒壚聆山陽之哀笛悲憂迸集誠何可言況元度千里若爲平生子卿一言已足千古如某於韞山侍御者哉憶初訂交年各壯盛毛義奉檄浮沉下僚王尊秉麾馳驅隴首回顧舊遊望長安於天上驚心故侶索端綺於袖中於時君以負米之故某竊投粲之風徐孺子之榻日掃於庭陳仲弓之居時行以酒壯志激昂關中氣盛短歌慷慨塞上聲悲弔咸原之故宮訪昭陵之舊跡斷碣橫偃於五柞春花盡飛於樂遊莫不發爲文章形於楮墨情辭兼

美迭唱良多乃方圖古歡忽繼離緒渭橋之柳旣依依而向人終南之雲復冉冉而別岫祖道凝雨孤程截煙故人河干遊子天末東望千里中懷百端蓋自有別離以來未有逾於此者也於是思緒相續別况各殊君遂舉春官入華省馮勤展施每欽公望阮孚清儉羣式古風廻翔瑣闥宣紫禁之黃麻伴直薇垣對文階之紅藥久參列宿旋擢南臺太微則執法名星政府則飛霜作簡驄馬辟人威逾桓典絳騶清路望重延年某以邊聽夫風聲常自驚其面目撫字之功畫諾靡及錢穀之吏風塵逼人惟賴良友之箴用勗服官之義迺故交方拭目於荆襄天下正想望其丰采而元瑜遽化爲異物稚

川已坐於日中遂令素車白馬莫慰范卿之心丹旒總
帷隱繫蒼生之痛豈不悲哉嗚呼驪駒在路垂二十年
玉棺下庭已四三載感歲華之邁盡觸景光而永傷今
年某月公子學洛攜韞山平生所爲詩文若干卷來江
陵屬某序之某忝附叔明之塵重以延祖之請用敢殫
述曩詎臚于簡端夫通明本非好爵疏受亦得還鄉小
山有叢桂之思歸田有逝塵之想豈難秉燭爲樂斗酒
相娛過楊雄問字之亭遂陳遵投轄之願乃此境卒不
可得斯人終莫與追顧以長卿之遺文德璉之舊作披
覽數四感慨橫生悲從中來憂不自已懷昔日之盛遊
撫一時之零落心魂動搖精采溘亂鴻章鉅製未足闕

其二三結言固忱聊自擴其情愫

國朝奏疏序

改朱雲木太守標本

道載詩書精義合天人之撰功垂竹帛名言宣德業之華既經國以綴猷亦匡時而建策虞廷敷納夏陞昌言矢彛訓於商伊告徽言於周旦奏疏之昉由來尙矣若乃徐巖之上書匡劉之封事司馬長卿之主文譎諫吾邱子贛之指事切陳或垂班史之書或入蕭梁之選迨至陸忠宣翰苑之集通鑑錄其卅篇范文正政府之編遺藁分爲四類斯固揚言之極則尤爲資獻之嘉謨讀歷朝奏議之章采名臣經濟之錄以文報國其書滿家伊古可徵於今爲盛書思對命論道經邦淵源上接於前賢啟沃聿隆於昭代此

雙白燕堂文集卷下

五

國朝奏疏之所由輯也仰惟我

列聖創垂駿業符二帝而邁三王羣賢襄贊鴻圖協五臣而超十治朝無闕事惟廣運夫文武聖神書必盡言非徒侈夫安平康樂夫際重熙之景運共繪光華頌嚮福於昌辰咸叨慶賞陽春和煦山川尙獻休徵復旦文明天地皆呈道寶宜乎高文典冊顯苞符而作手凌雲通德達情仰霄漢而懸心捧日既獻賡颺之表復多密勿之封論事則利溥仁言參政則要存大體考績循舜典三載有期董正法周官百僚無曠其薦達也白露被乎蒼葭其糾彈也青霜飛乎白簡若夫典禮正樂制度考文清廟明堂備簠簋瓊瑚之器膠庠太學儲鸞鳳杞

梓之材實學崇而僞體裁經術明於虎觀醕儒傳而良
史出書法仿乎龍門發潛德之幽光千秋彰美闡蓋忠
之顯跡一字褒榮耀德觀兵修文必兼修武取材講事
衛國卽以衛民命將行師軍雄鵝鶴運籌決策氣作熊
羆霆擊長鯨計出囊沙之妙算風清伏莽功成拔幟之
奇謀飛檄招安師稱貞吉焚香約誓兵是行仁或秉鉞
以臨邊寄重北門之鑰或建塘而捍海射回西浙之潮
頗牧在禁中佩囊有記何恂守關內挽粟無窮開阡陌
於遐荒黃沙綠野畫井田於絕域紫塞青疇惠露旁流
載膏者與歌芑黍仁風溥扇戴德者感頌甘棠化誕妄
之衰行型仁講讓示蕩平之正道易俗移風定制簡則

易從刪繁苛之峻網約法踈而不漏杜澆弊之萌芽推
神禹下泣之心睹墨舫而惻隱體成湯解網之意見赭
服而哀矜嚴捕務則萑苻肅清行保甲則茅簷靜謐且
也餘三恒足鄉閭安耕鑿之天取一有經倉廩富常平
之貲杜預號爲武庫損益得中張郁稱是書樓盈虛善
酌歉歲如逢樂歲蠲貸兼施祗年無異豐年梯航不匱
府海之利可因波熬白雪官山之法具在爐鑄青蚨瞻
蒲望杏敷郁禮於郊圻剝棗烹葵繪爾詩於黼座民隱
必燭心周畢雨箕風民依是圖靈効水夷海若防秋則
算無遺策禦冬則蓄已先儲凡斯樞要之建言實切本
根之大計文條理幹何慙賈茂董醇旨遠詞明悉本周

情孔思用流傳於朝野誠涵蓋夫古今某少研經術壯
治法言有志景行勤求章奏或抄錄於邸報或採摭於
書林篋笥廿年自覺搜羅漸富韋編一帙敢云節取無
遺數約六百餘篇提綱列目編爲三十二卷別類分門
見政事之有條識章程之大備括獻典獻書獻賦獻箴
之旨高挹羣言通曰都曰俞曰吁曰咈之經合爲一理
金甌永奠遐哉六代之宏規玉燭恒調允矣萬年之邦
治

石倉山館印譜序

代蕙菴公子巴哈布

懿昔青泥蒼水代有遺文赤玉丹章理參秘笈八會三元之錄肇自皇初五章九疊之傳稽諸史牘周治繆篆秦廢古文刻符仿乎六書摹印通乎八體漢志藝文隋志經籍篆刻之作由來尙矣李冰之論印法也神明於規矩方圓徐官之著印史也錯綜於陰陽奇偶龍蟠馬負聿開千古之圖書鳥跡蟲涎實萃百家之金石若夫官印私印書爵書名界朱白以成章出青藍而證古大書深刻園亭軒閣之題密字排窠騷賦歌詞之句花乳災同於簡畢棗心功讓乎刀錐假煮石以呈能遂濫觴而踵事苟適於用無美勿章肆屈曲於牢籠之中得微

雙白燕堂文集卷下

八

妙於筆墨之外是則廣堯章之譜彌見其多補松雪之編旁搜莫盡者歟僕也弄璋夙志提印先徵載觚榼而問奇衍巾箱而集古碧綾黃素背縫都鈐玉躐金題首標親押浣花紙上厯厯函筒章草篇中纍纍襲策聚於所好兼收奚別乎古今愛則斯傳共賞何分乎雅俗雕蟲技小誠非壯夫之所爲吐鳳文成如見古人之可作云爾

朱子像贊并序

代鄧西安

嘉慶二十有五年夏安徽人士之宦遊陝西者葺屋於
長安之南順坊爲安徽會館奉宋徽國朱文公神位於
其中州同吳縣朱君廷瑛公十九世裔孫也出所藏遺
像畀西鄉縣丞懷甯劉君寅屬工重樞龕諸別室廷楨
時守茲土爰系贊曰

崧華鎮地日星麗天我儀前哲越七百年孔思渠通周
情夢想濂洛同歸關閩並仰惟桑與梓必敬必恭讀公
遺書展公遺容世企山斗匪直宗鄉公德不遐公像在
堂

雙日燕堂文集卷下

九

眠琴小榭跋

代蓮龕方伯

西安糧儲官解冠山堂之西北隅舊有斗室宴坐容刻
平行礙眉蘇觀察雲耕二兄拓展一弓料量十笏移垣
闢徑讓東陸之修梧刪竹栽花帶南宮之瘦石居然綠
天庭院紅雨簾櫳矣方公考室三春會某移藩六詔聽
驪歌而錄別戀燕寢之凝香屬以眠琴署茲小榭石闌
點筆藉留行客之題珠柱橫床定選懷人之夢

唐氏兩世節孝贊并序 代朱虛舟中丞

臨桂舉人唐君廷鈺以知縣揀發陝西粟階旅見示以
官方題版衡才諮其家範迺知卅年通籍早憐孤露之
單寒再世貽芬實託慈雲之重蔭蓋唐君之成名本於
生祖母劉太孺人與賢母關太孺人之教也唐君奉其
所刊旌表節孝錄乞題受而讀之益歎苦節之貞世濟
其美義方之訓子正而賢昔白居易以榮陽鄭夫人爲
備女美婦德母儀三善若太孺人者不皆女有士行婦
兼子職母全師道者乎曹大家傳列女之誠桓少君誦
先姑之言斯誠中壺之弓裘宜表高閨之綽楔矣某小
學之年先大夫見背微先太夫人教育無以至今日也

雙白燕堂文集卷六

十

欲養不遇在鮮民常感於椎牛無忝所生羨賢尹勤思
乎封鮮也茲嘉懿爰作贊曰

曜靈植於結璘儷文巽維延粹兌野凝芬粵西女宗門
有通德陰禮順成房樂馮翼傳硯親畀遺經迭陳貞操
栝柏嘉蔭荃蓀再世闔門清貽喆邵緝柳助勤折藜敦
教克成令器克嗣前規先姑之訓賢母之徽綽楔旣崇
絲綸亦賁錫羨揚暉彤華是記

方友槎刺史雲洲草堂壽讌詩序

改門弟子本

夫荆麓之璞謝纁組以長完岱巔之松貫涼燠而不改
淡於人者貞於天毓其和者保其泰亦有典瑞呈寶來
茲永珍棟隆効材苞如彌固是以西昴分宿燭卿雲之
輝中崧降神穆清風之誦以今揆昔殆難其人友槎先
生秀鍾烟縕緒纘方雅貞吉德之一統達尊之三而鱗
曜羽晦厥遭各殊轂圓軫方所用亦異要其梗槩約可
敷陳六世清望式追銅川萬石素風並祠石相撤南頓
之寺舍守桐鄉之奉嘗問甘棠之港便爾浮家臥裛樹
之碑是焉卜築此先生之世澤也夏侯經術以承而家
相如文章無出其右之花蘭葉之紀述於童蒙雜碑雀

雙日流芳文集卷下

二

錄之辭驚其長者若華燁乎四照神籬珍其一毛鐘潛
德水應鯨鏗而上雲鼎出橫汾被龍文而歆景此先生
之初學也於時秋棠不華背諺獨樹南山之雨初歇河
陽之雲孤飛先生折蓁倍勤含菽逾味酌問字之酒躋
彼高堂分適館之餐馨爾夕膳泊乎西靦驥騫北溟鵬
運三千之牘車令驚其懸河十上之書咸陽傳其抵掌
捧檄匪喜色怡偏親負米亦勞腰折五斗此先生之自
弱冠至強仕也建康之治實表百城公孫之才爰攝五
縣鈞距則辨甲知乙輒斷則驗東指西三公之服用褒
郭卿一丈之車特異黃霸又戶載遺愛家銘去思邊海
榆檟課逾十年夾道楊槐蔭及百祀來暮起頌勒之邴

連之山爲于作歌調入伊涼之曲此先生之服官也及其致仕而家居也貴而能貧謙以承益池陽負渠之田無二千頃成都採桑之樹少八百株然乃北海尊酒坐客滿而損憂西華練裾故人聞而生感有平仲三族之惠無孝標五交之譏先生抑然不居側爾彌歉冬日之日詎矜奇溫春風風人不吝同煦此又先生高誼卓著於鄉人者也况復芝呈庭瑞蘭開室香兩鳳儀於朝陽雙珠爛其夕彩青箱舊學獨授元曾烏衣俊遊兼推道韞山陰文梓再見花開天上琅玕都垂玉照侯其禕而亦云僅矣歲在重光作噩先生周甲之期凡與先生令子遊者皆爲歌辭晉介耆耇以諒臣撫塵風契投簡弁

雙白燕堂文集卷下

三

言竊惟楚卹大隱拜延洪之符商山逸民衍平格之算迨觀先生而知德及年邵幽顯從同壽緣售名眷佑靡替也敬剪繁蕪謬爲批導云爾

章佳督部繹堂先生五十壽頌並序

大清受命百七十載重光繼昭到化允洽煦燠燾育汜
濩流沙以西徠十盧區陽方揚於邸賁白旄紕蜀江歷
於府黃芽所職注鳴跂踵內面厥角芻爽乎日月所入
粵稽大平平初之元草生河泛之紀主不虛王臣不虛
貴朱宣五正黃序九工子賚傅弼姬報雝鈴翼翼贊贊
麟烏乎千載方今

元首聖明股肱宣力靜護比節羣龍襄袞之時也我督
部章佳公繹堂先生乃武乃文以勤以庸優賢揚歷世
其忠貞統制河海遂鎮關西越今三年庶績伊喜雲布
雨施陽曜陰藏經緯禮俗恤隱民事螻螻之穴光被六

雙日燕堂文集卷下

三

幽風雲之塗鑿空萬里上自雲漢之首萌天稷系威弧
進并鉞踰天關帶終南地絡之陰鶉首實沈以負西海
揚靈繹厲飛和灑甘滲漉昭蘇者七十有二候也下自
昆侖之虛障伊吾徼唱鹿鐫葱嶺杠計式及三危歛露
之民柳谷反景被於長流魚頡鳥眴搏頰距躍謹聲推
化者三十有六部也昔周之興也召公以王命行江漢
其詩曰文武受命召公維翰又曰肇敏戎功用錫爾祉
蓋上有嘉樂憲德之君下有恭肅將明之臣以宏天保
孔固之業而共嚮壽富康甯之福矧

天子之德隆軌京周而公之入貞六官出表四國允宜
彰吉甫清風之誦效魯侯燕喜之祝者哉遂作頌曰

滔滔太始二儀既分或赤而白或綱而縕上規高顯下
萬安敦有物有則誕初生民生民維何稟懿川岳彌綸
出雲時雨滲漉炳靈載曜宗臣是毓崧鑒周神昃扶漢
籙光宗臣奕世載德籙受韋經研傳范石秉慶璿源
鍾華蘭澤經緯中芒象儀外式鳴和玉署漸吉金坡文
傳丹鳳書博白鷺花磚日麗珂佩風多綱持雨露黼藻
星河珊瑚網旁收珠衡四正竹貢春江波澄秋鏡羲索周
法孔繇先命桃李栽蕢梗梓專盛機庭北斗內相中台
謨宏制誥化協衡裁碧虛共轉黃道同迴典崇執度職
比程材鷄野狼屯梟江蠃沸火熱狐篝霜寒犢佩何鼓
專征肥胡秉帥謀建師中威揚閩外竟江蠻雨象郡蠻

雙白燕堂文集卷下

十四

風粵佗奉褚道覆潛蹤燧銷障傲戈偃朦腫榮專肅萃
德治精通桃河駛流棗野奔箭石下宣房焚瓠堰甲
子披圖庚辰靜鍊警懾堯吁功存禹甸扶風出塞博望
窮源六州番落九姓羌渾申驅漢節肅拜軍藩鞭行紅
柳雨濯青轅九命承流三秦作督幽籥冬和涼笳夜肅
闔洽西土仁封比屋猷林岑詡邊籌唐穆三公崔冕一
品萊衣蘭陔馨絜筍圃柔怕勤規士行讞問不疑宸榻
丕奠庭誥彌攷采采琅玕英英寶醴家慶蟬媽國華鵲
起籍判扈曹戟陪鳳宸玉馨偕和旗鈴合祉保生令旦
覽揆嘉辰龍圖數叶象衍蕃陳壺甯百福露斟千春瑞
符甲籙嘏應寅鈞維皇敷錫釐自通衆維民瀆懿躋堂

迓祝矧邀容接敢闕觚牘式摘頌言永茲介穀

雙白燕堂文集卷下

七

澹和草堂壽讌頌並序

澹和草堂者南海吳封公和衷先生之養堂而荷屋中丞歸省介壽之所也中丞布政黔中再權撫節嚮用方切懷歸孔懃

天子優之予假四月道光六年春孟旋於草堂被當亡之渥恩懃倚閭之勤望封公拜於前中丞拜於後純佑通衆齊齊愉愉笙雅叶乎絃匏庭誥銘於几杖積善之慶萃和斯堂豈直比隆畫錦爲閩里夸盛哉中丞欲遂陳情而封公感激寵遇舉四牡詩人靡盬之義勗以從公乃知爲子不廢私恩爲臣不忘公義

聖主所以教孝封公所以教忠而中丞之獲上順親施

雙日燕堂文集卷六

五

於家邦宜國人稱願以爲君子之子推本而歸媿之也凡習聞世德者咸有詠歌爰采延壽易林謹爲奉觴之頌頌曰

甘露醴泉紫芝朱草盈盛之門與以爲寶天福吉昌延年壽考壽考宜家蒙恩拜德生育賢人藩屏輔弼福祐屢臻思復邦國喜得天祥還歸其鄉析薪在克世祿久長舉家蒙歡齋福上堂上堂見觴四月來處家在海隅天之奧府馮粲風雲麟遊鳳舞麟鳳相隨宜出馳驅福祿重來使我安居積善有徵典冊法書入門上堂家樂以安下堂出門安上宜官蓼蕭灑灑湛露之歡君子往之陳力就列君贊其明恪敬兢職富于封君祿佑洋溢

入和出明與福相迎頌聲並作仁施大行可以饗養賴
福長生

雙白齋堂文集卷下

一六



福長生
入和出明與福相迎頌聲並作仁施大行可以饗養賴

演連珠八首爲都拜按察四十初度并序

按察都拜公運菴先生蒞陝西之三年天和孔容元鏡
苞曜雷動雲搖陽升陰潛之化辯秩乎彝庚欲灑吐鎬
抱杜環鄂之寓翦祓乎不譖五緯所舍日月所入齊齊
純純喁喁如也夫玉琯正而景風鬯朱絲張而長麗翔
朝陽暘而慶雲藂醴泉洑而華平苗方今二儀烟煴百
殖衍燕上有天保戩穀之美下有旣醉備福之告用成
蓼蕭壽豈之應申以臺萊保艾之釐矧公出展

帝采入寧世求肄勤以勵於邦載德以祿於家者哉歲
在端蒙大淵獻公春秋四十月二十有九日爲覽揆
之辰敬侑卮辭庸介綬壽將以迪喆允譽洪嫩頌善也

雙白燕堂文集卷下

七

蓋聞元醴九派榮光導夫葱源神芝五光翹陸延夫樽
采是以寶鼎黼黻之琛拜栒戈於西京金鐘景襄之銘
勒昆冶於東海

蓋聞華鯨鼓沫照歸塘而鏡暉瑞鷗騰雲儀元扈而習
吉是以頽川射策之歲九試九經琅琊著書之才一官
一集

蓋聞河漢卿喬炳英於列宿淵海金玉探蹟於篇家是
以郎位一十五星內階恣其緯寶書百二十國秘笈摛
其華

蓋聞郢化旁鬯滌瑕而鏡清庸勳懋昭文揆而武邊是
以繡衣舳舻露冕懾其稜威散騎貂蟬兜鍪肇夫蕃錫

蓋聞景星闔曜不若天樞之拱辰暘都煦春何如日御
之覲午是以閭闔仰福當陽觀其龍光璨粉求章令德
滑其燕語

蓋聞陔蘭擷穎貞蕤乎堯莫春暉承暄肅陽乎舜日是
以魯侯報政結蔭南山之橋康樂策勳足娛東壑之屐
蓋聞良輔坎孚守幽貞乎震軌嶽挺瀆秀載物亨乎坤
元是以三珠効琛彪虎定陵之族九葉通彖鏘鳳有媯
之門

蓋聞中台曬光旗翼不能附其影太華表峻嵩岱不能
肩其麓是以昆侖之地軸三十六東巨青城之居牟尼
之世界億大千西晉赤蓮之祝

爲朱方伯配王夫人四十初度演連珠十二首并序
粵以敦牂之年履端之月陽籥初赤陰鍾已黃長至之
景照西池而再中亞歲之花獻東王而四照輜駟青紫
成陰通德之堂瑤珥煩黃曳帔元君之府蓋我虛舟方
伯大人德配王夫人之四十合且也執徐上春方伯以
龍旂入覲之期值鳳衍重周之策亢爲疏寢本隸壽星
水近帝瀛原名祿海曾侯燕喜

天子嘉其作朋召伯旬宣

至尊綏之多福而樊川錫宴杜公則如在雲中梓澤開
筵士衡則未來日下今者星輓揚光瑤符啟錄安妃玉
樹已復花開青女璫璫卽時春色武林水淺古稱一葦

雙日燕堂文集卷下

九

可杭閬苑仙多恰值千齡効祝昔大夫蘋藻詩人以首
國風女士珩璜中壘用爲列傳矧夫人戟門秉曜月室
含章珈蓂節步不忘德象之篇澤雉文衣彌肅女宗之
訓高掌西蹠卽對粧樓長河北臨還開織室漏盡而猶
參衡石燭熟而更問平反是則南陽合政杜母樂其重
來潁川家居鍾氏垂爲世則者也耀遙過平津之館容
久三年入郗傅之庭心儀七德謹演連珠十二章以揚
合善用介景福云爾

蓋聞嶽挺瀆秀資生貞於地元離景坎符絜齊歸於巽
德是以唐山壽曲被都荔之芳滄浦清絃樂文桐之直
蓋聞望娥矚光旗翼不能附其景天姥表峻英岷不能

肩其麓是以昆侖之地軸三十咸環翠水之居須彌之世界億千齊上白蓮之祝

蓋聞上相開國珥紫貂者六人秘書承家衍青箱者七葉是以草生元圃卽是琅玕石種青城皆非瑛玊

蓋聞清門之慶成於婦道循績之茂本之內助是以湖亭臨水無一片之沉香成都負郭少二千之私賂

蓋聞貴不忘儉則物節可久才以載德則言質非綺是以春水津合聞桑館之雞聲秋菊尊芳擘桃文之繭紙

蓋聞朱草萸茂產於雍梁甘醴闔澤承以竹葦是以關重百二甘棠成壽木之林嶽仞五千玉女降明星之瑞

蓋聞石窠之封齊侯嘉其禮延鄉之邑漢王識其名是

以青鸞書降

雙白燕堂文集卷下

二

帝錫延洪之算紫泥封溼天頌益壽之經

蓋聞燭火雖耀不若羲馭之春迴霖雨誠久不若湛露之宵渥是以魚軒八命絳霄擁錫福之衢褔狄七章赤

霞綉羣真之服

蓋聞暘谷一氣實平八風葱河兩本俱成五色是以玉生庭照都開九節之花珠繞翠環盡縮千年之結

蓋聞律周玉管則百寶應祥星迴金度則萬族啟室是以蒼龍日璧紀元者爲正爲春朱鳥雲窻望氣者爲慶

爲禱

蓋聞常山紫秀昌容以之易泉層城白環婉姸以之組

瑄是以沐甲浴乙日華浮帝女之桑出丙入丁井絡近
星娥之館

蓋聞泰階正符應之者多壽長庚麗軌見之者有慶是
以

龍飛百七十載皇衢之日月方中鳩族萬八千年闡閱
亦雲霄而上

雙白燕文集卷下

祭故臨潼縣知縣莊君文

嗚呼先生古道云衰瀆風日漓篤生君子障之末流才
爲世出行爲士師乃天所植匪學能之今也則亡胡甯
不悲嗚呼先生生而穎異始就外傳髫髻發穎暨既學文
章旁求吏治一爲博士表表愈偉焜焜其英完完其儀
考宰宜城佐理庶務所爲既當巧匠驚顧謂公之才是
宜趨試爰喪厥考惇惇若疚奉茲不諱舟行幾覆篙櫓
俱失舟子縮手眾皆號呼唯公獨否謂我先君豈曰無
後居喪三年惟禮是守有弟于于出入相從孝弟菴菴
亦見古風公之愛慕蓋由天縱勇於爲人不自貴重洎
登賢書遂令汧陽汧陽之政既弊且冠政繁訟滋得公

雙白燕堂文集卷下

三

以治公謂汧民爾無驚畏官爾父母爾我赤子爾安爾
業爾疆爾理公之在理如駒脫羈亦施其學亦展其才
繼調醴泉適征西域大兵所經戎務紛藉惟公所辦大
備于人以得克敵將軍以聞

天子曰吁嘉爾軍功賜之以級以勗爾忠公既受賜公
歸所部所部稱良惟公所撫在醴五年民無冤苦去爲
咸甯義聲先路見公之車民懷孺孺謂公之來我民之
祚再爲臨潼發粟振饑所活萬人民賴公蘇及公政成
大府以記

天子曰咨汝予良吏予加爾秩其爲刺史民之望公如
病思起公拜稽首母老當歸

天子曰嗟遂其孝思及公之歸草長園林奉公之母其
樂歆歆撫公之子鞠公之孫庭花四合培基植根公之
爲人履道坦坦四爲縣令至有合聞

天子大孝親賢尊老謂宜百年以作壽考碩果不實天
道甯論鬱鬱佳城茫茫九原幽宵永閉慘淡風煙平生
知舊羅拜棺前從今已矣泣涕漣漣魂兮歸來鑒此短
篇

祭劉英初編修文

嗚呼疇昔交君同爲少年連鑣京國意氣雷顛九陌看
花繁臺春豔題壁籠紗引盃說劍英英名譽袞袞公卿
俊遊高會譚讌從橫語妙君房神清叔寶落落抒懷欽
欽在抱荀卿遊學早著長安一編甫構萬口傳觀文史
三冬成均覺舍賦價金高詞源珠瀉秋堂鐙暗春簾雨
餘高軒在門時聞讀書五十功名用償佔畢射策平津
甲科第一高岡威鳳翹羽天衢振采飛鳴凡鳥皆無玉
署排籤蓬山仙從賦雪能寒眼雲有夢穠桃無限開遍
春風靈葩一樹偏恨能紅猿臂挽強大黃猶射李蔡封
侯才原中下嘔心精竭江筆非花長饑臣朔貨廡東華

雙白燕堂文集卷六

三十四

有數稱奇無權造命平子工愁仲宣多病溯君地望江
左謝王典型勲業載在旂常鄭氏小同清芬是繼述德
無忘貽謀勿替君登上第通顯是期宜秉文衡拜獻彤
墀詎謂沉淪一官十載寒峻疇依名流競慨君之交友
不尙矜嚴片語微長取善能兼朗月澄霄和風被隔管
輅清譚三升醕酒平生絕學旁逮百家叔向數典多聞
早誇君爲詩文滔滔清絕如晷餘香能縈曲折仙都廣
樂手按雲璈急管繁絃幽咽檀槽旣畀君才胡艱厥遇
選夢無靄排閭誰訴昔君南返致養陔蘭風雨歸舟握
手盤桓信誓未終言猶在耳曾不逾時遽傳哀誄君更
憂患嬰疾已深蠹枯作爾草死抽心嫻特耆成同揮清

淚家多哭寢士競爲位隨武之德音觀九原矧居朋舊
曾共清尊執紼偕來生芻一束抒舊陳情靈兮來復尙
饗

雙白燕堂文集卷下

三

祭莊伯鴻司馬文

嗚呼生也有涯死也無涯以年命爲修短豈達士之言耶君旣反真兮而吾又奚嗟顧念君之世德宜丕振於而家矧以君之才行將揚厯乎助階而得年之僅此何酬善之常差風蕭蕭而易頃日摻摻而欲斜庭豈集乎鴛鵲歲豈值乎龍蛇噫良吏之不永輟相杵而歌些感遺愛而屑涕知民譽之所嘉况結言於金石曾托契於雲霞嗚呼司馬知君弱冠垂三十年君以名父之子結交羣賢顧厨俊及接跡隨肩神清冠玉望如神仙三輔敦槃之坐五陵俎之間或嘔心而覓句或叉手而成篇高文屈其前輩雄辯驚乎四筵君方年少氣盛陵厲

無前視青紫如拾芥躡初枕而趾顛遇輕肥於同學怵庸庸之我先會楚蜀之蠢動將從事於鞶韞遂納粟而作宰仍捧檄於秦川嗚呼司馬計君之服官也攝咸陽與大荔旋眞授乎藍田移咸甯之首劇乃擢守乎潼關案無留獄閭無保姦黃次公之剖決雋不疑之平反屏苞苴而懸鱗解劍刀而驅犍治最百城之表謳思十室之絃愴遺鳧之怛化御紫氣而踟躕見秦牛於河上知關尹之不延使中壽之可假匪右秩之頻遷庶公才而公望展經緯之便使人百身而難贖空涕泗之如漣嗚呼司馬吾識君爲最早撫紀羣之素交敦籍咸之夙好數通德之聞人繼南華之壽考蘭以薰而自焚膏以明

而終燎既哭兵備於河朔復殞徵君於江表越三稔而
喪三良悼名宗之賢少豈下泉之需才萎哲人於宿草
晞薤葉之朝露期大齊而孰保吾爲國而惜人固惟賢
之所寶矧欵欵於平生常推襟而送抱感中道之淹滯
更家貧而親老聆寡鶴之悲鳴閔童烏之弱小駕郭北
之素車發關西之丹旆籍同僚而送孥悵故交而薦醪
嗚呼鐘沈德水劍沒豐城薄風雲於元感望牛斗於青
冥蘇子歎懷之賦庾郎思舊之銘藉有窮之縑素傳無
竟之哀情出秦關而祖奠言觴酒而鉶牲亮魂氣之所
託猶縈戀乎西京

陝西同鄉公祭費鹿溪封君文

嗚呼擷芝草者莫知其根之茂挹醴泉者莫測其源之深繁樹善而滋德斯哲人之代興吾將溯世風之淳邈訪耆舊於延陵舉封公之高義爲台考之儀型方保艾乎爾後冀期頤之允升儼靈光其在望胡歸然而遽傾嗚呼惟公之先著乎史策江夏宗支茗溪世葉美仁里於南蘭旋卜居於斯邑公少孤貧嘗隨郡牒食力椽史程能筐篋治丙少卿之律合習黃次公之文法凡有處議必合乎人心其所持平匪撓乎威懼逮公以上郡決曹之辟作大藩從事之賓平讞乎南徐贊政乎西秦以文毋害實公德之普存也恣愚之宥賴公以生者且數

十百人也古稱于公治獄多陰德而定國及永並爲名臣郭躬以廷尉典獄而平刑審斷本乎其親洵法家之延慶不於其身於子孫乎觀封公之食報而益信乎前聞也公之伯子舉於其鄉歷官關輔承公義方雄州作牧列郡分章仲以防河而著績克光益乎上綱復文孫之踵武爲百粵之循良遇隆恩而加秩旣屢荷乎龍光公則喻志邱園怡神几杖訓昆旅以在官卻安輿之迎養知足何求當仁不讓廉泉之潤必及乎周親優老之金常分乎戚黨孰朝而不鋪也公遺之積孰冬而不裯也公解之衣殯之久而無以葬也公撿其鬻節之貞而無以守也公郵其蔭蓋公之爲善於鄉也數十寒暑於

茲矣鄉之父老子弟感公之德而傷公之逝者疇不齎
咨而涕洟嗚呼綜公平生行誼誠古賢人之風邪是積
善成德而享其隆邪其生也備福錫羨而昭明有融其
歿也歸真返璞而高朗令終邪世濟其美人懷其德夫
亦奚憾而奚恫乎方嗣君之報政
帝京也誦陔笙之詩相戒以養而公未許其陳情迨各
之其所治而赴人已臨嗟陟謁以靡及駕薄笨而邁行
某等識陳紀於家街知秉教於趨庭凡太邱之碩德咸
耳熟而心欽愴愛日之逾邁悲晨星之易沉言攄哀而
製諷言設醴而鉶牲仵靈旗之徬徠來格而來歆

公祭黃恕堂先生文

猗維我公早覲荼毒重闈翹蔭繁長繫育晨颺泣樹夜
誦芟蒿餘喘踰躡獨泗而眺毀室防鴉辭巢感鵠十笏
誰營三遷靡託英英寶醴采采琅玕璿靈擢根珠池導
源曷哉儒修端乃初服韜輝滌瑕式金式珏有淵其質
有鶯其文黃中通理藝林擷芬平子工愁相如善病盛
志誰酬清塗孰竟塵棲白袷幕捲紅蓮未妨投筆早趁
先鞭洞庭秋波粘天一碧迴湍墮星激浪立石千尺逆
上北沅南湘帆影九面衡山之陽魚長欲飛猿啼似笑
船指箭脫目不停眺逝水冥冥歸雲陰陰浦思山哀鬱
紆客心梁苑倦游江樓感賦彈鋏長歸飄蓬小住爰篤
先業爰恢後規尚矩緝範丕基巨垂庭誥推顏族師奉
季戚鄙咸雍子姓咸庇旁逮朋舊愛逾周親葛衫念故
縞帶如新孰吉不神孰凶不經孰饑不舖孰渴不啜蘇
枯潤芟決江灑河人集於蓼若已是瘡春館棠藜秋徑
松菊娛清毓和永迓環穀靈福保艾孔熾且長曾是景
命竟不于常孔鴛鸞雛德門止止述志無憂克家有子
鴻都討古虎觀談經東南竹箭貢之

帝廷陸謝雲間荀來日下龍駭待騫鯢鵬竟化

陝甘總督那公夫人誄

嘉慶十有六年九月十五日陝甘總督那公繼室宗室夫人卒嗚呼哀哉玉柱峻謨金波逝陰娥筠霜籜茗瑄灰青胡云不榮彤華飛焯胡云不傷寒曜戢暑椒焚猶郁膏燼猶薰無百歲之樹檟有千秋之貞珉託旂旒以累德述鍾萬以圖芬乃爲誄曰

猗歟夫人坤輿粹鍾既稱女師亦曰禮宗瑤澗儷光璇樞鬱彩植榦華銑分支靈海英英寶醴采采琅玕月竈秘儀星潢潤源失恃觸辰庀家筭歲內紀攝操羣季檢詢愔愔德音申申整暇授業扶風肅規林下括音鶴集始且雁雛雲頰滌藻竊心窵容契濶寢門貞吉中饋言

雙白燕堂文集卷下

三

默已喻志承克慰晨禽喈喈已潔修暇啼鳥嗽嗽尙勤箴管食獨諳性適鹹調辛衣獨安吉說禮娛身脫釧酬書徹環佐讀媪孀盈籤謨觴積軸光光夫子儀羽雲遶出持禁節人侍皇闈含暉表冲撫謙以約儉守蔬布政修帷薄求賢方雅致聘高邱深仁螽羽均一鳴鳩二十年作嬪君子馮翼安世穆宣陰禮君子于役西窮天山靈關春阻飛沙晝殷君子有行東奠滄溘糖屬宣房鏡澄太史冥冥經緯安安鎮靜綜理闡幙代奉溫清金城贊政紫微促裝魚軒遠陟翟茀遊行華屋財臨高春遽暮脫筓不留闕川難駐羣蒿歸莽重娶首塗猶垂總帳虛仞靈壺亦有茗華嚴粧婉束亦有姬姜委佗象服

當時則榮沒世曷稱惟此上德千載其馨鬣封四結虬
松万年徃日莫追存名永傳嗚呼哀哉

雙白燕堂文集卷下

三十一

旌表節孝扶風縣知縣贈知府莊府君繼室于太恭人

墓誌 代莊中允通敏

太恭人姓于氏金壇望族也祖漢翔康熙壬戌進士禮部郎中考崇廩貢生贈延慶州知州廷尉之門勳名延於數世賓資之族文武寄於一家太恭人幼秉令淑動合儀則德容教於公宮絜清聞之師氏年二十五歸我從祖伯父扶風縣知縣前內閣中書諱秉中爲繼室結禱孔燕疾言不聞解組同歸食貧是旨娛老之饌調以滑甘知子之來撤其環瑱尊章樂乎婦順同室無間人言越二年扶風府君以疾卒元配楊太恭人遺孤敏來年甫十二仙尹違世悵遺鳥之遽飛嫺嫺叩心訝嚴城

雙白燕堂文集卷下

三

之忽墮元瑜惇獨之發任昉流離之孤斷織杼空推珠簌盡門無絮酒之彥巷易烏衣之主太恭人依於外家庀其內政孟堅之庭大家歸而續史宣文之幔羣從侍其譚經撫姪于時兆如子迨時兆官直隸藁城縣知縣擢知延慶州迎養太恭人於官所而敏來已前卒孫振因族之仕於京師者亦奉其母張太恭人居於北平中朝之望嫺姪咸在東征之篇婦姑並賦是則李燮成立終藉文姬江表博聞尤資大母泣賜研於塵函課遺書於故篋乾隆某年太恭人守節若干載旌於朝復以時兆不忘太恭人之教遵例賜封宜人綽楔斯峻髮禴在躬彤筆紀爲美談輜車式

其令問已旣而振揀發陝西補西安府司獄奉檄入關
板輿就道飭令伯之官方問翁歸之舊政東平小君未
衰視聽隴國命婦宜登期頤玉瀝未開瑤華旋揜乾隆
某年卒於西安公館享年八十有五後振以軍功擢韓
城縣知縣遷乾州知州以知府升用

晉贈恭人愍榮之恩銘之輦帶報劉之饋豐於列鼎而
振從事戎行盡職鮮暇始以嘉慶九年十二月某日歸
葬太恭人於某鄉之原以歷年久卜兆去扶風府君壙
若干尺愼也魂兮歸只祔也離之反葬成仁異窆從禮
襄寒泉而增痛愴秋霜之遽零溯摩笄之志則戚卹動
容誦闔門之操則賓從聳聽通敏爲太恭人功服從子

雙白燕堂文集卷下

三

負嚴憲忍辱之誠思皇甫帶經之箴元龜告辰文珉扃
兆陵回返壤庶方宋伯姬之幽垆日弁高春無採魯季
姜之封樹

陝甘總督章佳公夫人靈表

嘉慶十有六年九月庚寅兵部尚書陝甘總督章佳公繼室宗室夫人卒於署春秋四十有七其明月反葬京師臯稽振飈甘華秋籜常儀戢霸娥英夜寒昆侖玉橫沈九井而攜燿鍾山鑪冶歷三變而曬光不有壽珉曷彰煒策夫人系出宗室故鎮守陝西西安將軍恆瑞之女也生應靈和誕啟光度暘谷日曠秀華蓮之支神潢星殷疏析木之潤爰自羈馨垂芬珩璜範圖曲儀動式女憲幼喪母將軍奉使西域夫人扶翼內政檢誨羣季如成人焉閨檐總操經緯寘布江左謝遏肅林下之規扶風賈逵受壁中之訓淑問以著括音允臧年十九繼

雙白燕堂文集卷六

三五

室於公公故大學士文成公孫少孤奉太夫人教爲今名臣西京丞相世躋三能東海秘書光重七葉固知焦明歸昌諧長麗而披耀雲和振越叶咸池而効響是以儷墮赤野合珥藍畦考鐘來雍饋案齋穆奉箴言於師氏虔展覲於威姑怡旨栗榛飭佩箴管白華絳趺侑廣微之馨潔縹被疏帳侍公奕之溫清洎公影纓華省擁節封圻凜上將之何鼓總宣防於靈瀆夫人笄珈應圖蓼衣節步履貴能降處膏不腴宗嫺式禮於鍾邢須臾捐思於沱汜故得祥分燕姑佳遶泉仰琅玕擢其駢柯蓀蕙接其鄂跗公當再奉

嚴旨出塞夫人上堂起居中饋契濶豐悴各愔其宜稱

陶戚不介乎容儀樹倚閭之懃憂釋闔門之懼懼持情
鎮物有獨難焉公仍奉命總督陝甘太夫人就養夫人
奉烝嘗於家術躬繅繭於皇闈倦少君養姑之誠懃德
耀如賓之敬踰瞻雞塞過命魚軒以今歲八月至於蘭
州隴坻塗迴煖涼氣侵丹液之瀝未開穠華之輝不振
嗚呼惜哉惟夫人毓粹清華含章貞吉詩禮悅性綈練
宜躬徹瑱購鄉媵之文傾籤市媪孀之笈窈窕德象綢
繆倫紀儉而有度廉而好施紉國僑之紵衣被其僚友
班鄭表之祿秩逮乎周親九膽勵學無分於適支含飴
佐餽必均於童穉若其秉易直於言容通神明於孝弟
不惑衰誕不宗老釋故方沈疴孔亟卻請於襮衰彌留

雙日燕堂文集卷下

三

之言惟勤於侍奉是乃愛敬天情純和地德女師彤管
庸有間然今畫髮首塗房腸行掩哀子容安等感尸鳩
之平一傷樹護而憂痲靡所底念迺請於公撰錄內行
咨之羣儒耀適辱公之齒聆誦夫人之德履不敢以讓
遂著靈表而申辭曰

曜靈植幹結璘儷文異維延粹兌野凝芬賁儀魯篇式
範周策陰禮順成房樂馮翼允迪惠問克嗣音徽飾卻
曼采華奕昌暉搏脯晉筭賓蘋湘綺婉聽尊章柔正君
子容與圖史經緯檐帷詵螽振緝穆葛將綏笄象郁譽
綸翟滋冲豐悴循遇喜愠韜容展如之媛洵汁酬德結
綽麗禡年壽上極伊何圓穹已憮已威璿華旋闕靈瑄

俄摧東遼雕輻北首泉里君姑矜惇純孝擗毀逝年莫
援來芳允升貞石采紀弗賈崩陵

雙白燕堂文集卷下

三

我

朝乾隆嘉慶間文治昌明人才蔚起而我郡人文亦於斯爲盛自經傳史志以及六書音韻方輿律算金石考據之學莫不有專門名家而詩古文辭更幾幾乎戶著一編人具一體以是毘陵學術爲當代冠時則我 本生王父徵君公與我 曾王父祁生先生以從父子而交相師友又少皆孤露內秉節母之教外請先達之益於學無所不通於文無所不工年未二十而二陸之稱傾動江表一時名公巨卿者宿豪俊靡不折節論交幕府文章互爲雄長今讀阮文達公定香亭筆記及曾賓谷都轉

雙白燕堂文集誌後

一

邗上題襟集所錄率皆先人少作其見推於世已若此然才不偶命竟以文人終至今方聞綴學之士展遺編而談逸事沈吟往復企想生平猶慨然有餘慕焉顧 曾王父雖久屈校官尙得於教士之閒手訂詩文次第授梓今所存崇百藥齋全集四十卷及合肥學舍札記十二卷是也惟 本生王父飢驅遠遊足跡半天下未嘗有端居簡適時道光初元

詔舉

孝廉方正當事者以名應徵時遠客晉中年將耳順大府往復致書敦迫就辟入都策試列一等以教職用銓授阜甯訓導數月卒官終身砥節礪行

孝友純懿所至僉以賓師尊禮推誠與物未嘗有
忤而侃侃守正終莫敢干以私操履綦嚴審事綦
慎於著述轉不自愛重又無暇編訂無力梓行研
經之說多爲時賢入集他作復信手散棄惟古今
體詩八卷集唐詩二卷經劉芙初李申耆兩先生
訂定我季父子受府君曾兩刊之又金石續編二
十一卷以補王萃編之遺漏然隨見隨錄未爲完
本季父觀察湘中何子貞太史謂此近時絕學足
以壽世而宗丈星農殿撰嗜古有素樂爲蒐輯用
得排比成書季父於引疾後梓諸里中顧時已病
殆刊本譌謬未得與殿撰面爲校證故雖梓成而

雙白燕堂文集誌後

二

未遽行播也文稿僅存數十首有自作有代人作
又爲所主達官貴人箋奏啟贈之篇積久成帙自
署曰畫墁賸稿謂不足問世第藏諸家比祐勤權
知興國之次年議修州書梓工踵至因釐文集爲
上下卷錄賸稿爲八卷以付梓人凡兩閱月而工
畢伏念祐勤十齡失怙先母李恭人教督嚴至常
歷舉先代遺事以詔之大小之杖冠猶未已里中
諸老以祐勤母教甚備志學頗早與族子光甫編
修爾熙復有二陸之目何圖淹忽數十年光甫克
自樹立遽先溘逝祐勤則浮沈下吏於學於仕兩
無所成近辜慈訓遠負貽謀明發興懷屏營惕息

自茲以往惟有謹守遺集以迺我後人俾知吾郡
英俊之域吾家文學之門述祖德而誦清芬由材
藝以覘器識宗昆子姓庸念祇承庶幾丕振家聲
引之弗替也哉校勘既竣謹誌簡末時光緒四年
夏五孫祐勤敬刊並識

雙白燕堂文集誌後

三

